

AMANDMAN NA NACRT ZAKONA O IZMJENAMA I DOPUNAMA ZAKONA O FISKALNIM SISTEMIMA

U Nacrtu Zakona o izmjenama i dopunama Zakona o fiskalnim sistemima ispred člana 1. dodaje se novi član koji glasi:

Član 1.

U Zakonu o fiskalnim sistemima („Službene novine Federacije BiH“, broj: 81/09), u članu 5. u stavu 1. iza tačke o) dodaje se nova tačka p) koja glasi: „prometi dobara na veliko“.

Ostali članovi pomijeraju se za jedno mjesto.

Obrazloženje

Prema Zakonu o fiskalnim sistemima („Službene novine Federacije BiH“, broj: 81/09) propisana je obaveza evidentiranja svakog pojedinačno ostvarenog prometa preko fiskalnih uređaja u veleprodaji. Međutim, fiskalne kase u veleprodaji su nepotrebne i ni u kojoj mjeri ne pospješuju nivo porezne discipline.

Ovakvim rješenjem poslodavci su izloženi povećanim troškovima kroz nabavku i održavanje fiskalnih uređaja, tehničkih pregleda, troškova administracije, i slično. Dodatne troškove nameće i obaveza da se pored izdavanja fiskalnog računa kupcu mora izdati i obični račun, što znači duplo printanje i dupli posao.

Treba uzeti u obzir i činjenicu da velike firme imaju i po 5 fiskalnih uređaja, za koje su ogromni troškovi održavanja, tehničkih pregleda, nabavke dijelova i drugo.

Slučajevi iz prakse pokazuju da često fiskalni uređaji nisu u funkciji, a u slučaju nepostojanja bar jednog ispravnog fiskalnog uređaja na prodajnom mjestu, obveznik je dužan klijentu izdati fiskalni račun pisan rukom u dva primjerka, što znači dodatno gubljenje vremena i novo opterećenje za obveznika.

Na osnovu podataka koje smo dobili od Porezne uprave Federacije BiH broj fiskalizovanih pravnih lica u Federaciji BiH je 53.142, a broj poslovnih jedinica fiskalizovanih pravnih lica u Federaciji BiH je 18.824, što ukupno iznosi 71.966. **Ukupan broj fiskalni uređaja je 83.090.**

Na osnovu urađene analize utvrđeno je da je opterećenje na godišnjem nivou oko 20 miliona KM, što za pet godina iznosi 100 miliona KM.

Fiskalizacija u veleprodaji je ukinuta u Republici Srpskoj Zakonom o izmjenama i dopunama Zakona o fiskalnim kasama („Službeni glasnik Republike Srpske“, broj: 65/14) koji je donesen 2014. godine. U Federaciji BiH nisu donesene nikakve izmjene.

Na ovaj način se narušava princip ravnopravnosti poslovnih subjekata u jedinstvenom tržišnom sistemu jedne države, jer FBiH i dalje ostaje pod pritiskom fiskalizacije.

Poslodavci u Republici Srpskoj se nalaze u povlaštenom položaju u odnosu na poslodavce iz FBiH i donošenjem različitih zakonskih rješenja na području dva entiteta ne omogućavaju se fer i jednaki uslovi poslovanja za privredne subjekte na teritoriji čitave države BiH.

U Brčko Distriktu je krajem 2016. godine donesen Zakon o fiskalnim sistemima i tim zakonom je iz fiskalizacije izuzet promet dobara na veliko.

Jasno je da se ovakvim zakonskim rješenjima u Federaciji BiH ne doprinosi poboljšanju poslovnog ambijenta i ne rasterećuju poslodavci, stoga vas molimo da shvatite značaj ovog problema i uvažite Inicijativu Udruženja poslodavaca FBiH. Neophodno je harmonizirati propise na nivou entiteta i po uzoru na Republiku Srpsku i Brčko Distrikt ukinuti obavezu fiskalizacije u veleprodaji.

Također, želimo napomenuti da je Udruženje poslodavaca FBiH organizovalo sastanak sa Upravom za indirektno oporezivanje BiH kako bi se razgovaralo o ovom problemu i na sastanku je rečeno da se ovo pitanje reguliše na entitetskim nivoima i da Uprava za indirektno oporezivanje ne insistira na fiskalnim uređajima, te da ne vide nikakav razlog zbog kojeg se ne bi prihvatila inicijativa za ukidanje fiskalizacije u veleprodaji.